

四明叢書

張宗祥



張蒼水集附錄卷六

題詠下

文

張督師畫像記

全祖望

吾鄉傳張督師畫像者頗多其遺集卷首亦有之而神氣骨相各不同先伯母自黃巖歸予以叩之則曰無一肖者嘗聞先公於甲辰錢塘獄中曾寫一像當有存者汝盍訪之予乃貽書訪之萬九沙先輩而九沙曰有之因摹寄焉先伯母曰是已予遂取姚江黃先生之志楊徵士遜之記及吳農祥傳讀於旁先伯母曰惟吳傳舛

戾無可信者然吾所記軼事雖毫忘十九尙有足以補黃楊之闕汝其識之先公生平不執宿見畫江之役閩中以詔書至張公國維熊公汝霖謂不宜開讀以阻軍氣朱公大典錢公肅樂恐啟爭端相持未下當時庶僚疏論此事者李侍郎長祥與先公右張而楊侍御文瓚右朱先公卽出揭力排楊由是相爲水火及議遣大臣入閩先公方以翰林兼行人請得輔行以折閩人之詰難已而楊之兄弟娣姒一門死義先公在海上貽書汝諸祖以爲媿良友今其牘尙有存也舟山之陷也張名

振初聞大兵三道竝出自以習熟形勢謂蛟關天險不可旦夕下乃悉其銳師奉王揚聲趨松江以牽舟山之勢是時先公亦爲所拉同在行間不料蕩胡失守以火攻死一夕昏霧大兵畢渡名振已抵上海聞變遽還則不及矣謂其輕出則可謂其奉王以逃則誤也是時名振老母愛弟妻子俱在城中卒以一門殉使其逃則何不盡室而行乎甲午名振邀先公入長江誠意伯劉孔昭亦同行或言孔昭先朝巨奸豈可與共事先公曰孔昭之亂南都擢髮不足罄其罪然當趙之龍輩迎降恐

後獨全軍出海則尙有可錄者今託同仇之義以來疾之已甚恐其爲馬士英之續也聞者遑焉乙未名振病卒遺令以部卒來屬先公麾下始盛鄭氏遣人來通好先公言監國乾侯之辱鄭氏修唐藩頌詔之隙也然鄭氏不肯負唐吾又豈敢負魯故雖與鄭氏合從而終爲魯鄭氏亦諒先公之誠也以公誼相重焉是時鄖陽山寨有所謂十三家軍者滇事之急先公嘗遣吳職方祖錫往說之令出兵撓楚以救滇而不克壬寅而後先公貽書汝諸祖以事不可爲欲散其軍然日復一日以王

在也直至甲辰王薨而後決計入山故采薇之吟自此而始先公有從弟從軍海上入山以後不知所終聞有冒其名至錢唐者爲諸遺民所詰而去先伯母之所傳如此是時年八十矣牙齒俱脫懸畫像於房喃喃然且泣且語每語又於邑聞者皆泣下而督師之鬚眉亦浮動紙上予時年十八據觚而聽聽已卽記之然其文草草未就也未幾先伯母返黃巖踰年而卒雍正己酉始重爲詮次而記之畫像之首歐公記王彥章畫像多正舊五代史之謬者予文雖劣亦不爲無補也

與趙谷林辨嘯臺集中紀蒼水事迹書

全祖望

吳農祥嘯臺集其文散漫冗長固不足言而所紀明季
事尤失實如謂劉閣部中藻與李尙書向中揮戈海上
瞿臨桂死黔中陳大樽之殉節隆武贈官大樽死於丁亥隆武亡於
丙戌章格庵爲閣部章官少宰信口妄言欺世人之不知愚不
能屈指數也請但以張侍郎一傳言之其曰監國賜公
進士出身授兵曹按公釋褐官檢討掌制誥事兼行人
使閩非部郎也其曰改兵科監張名振軍出松江颶風

覆舟六日錢唐失守扈監國出舟山依名振名振死公
領其眾舟山破扈監國至廈門按公由檢討擢僉都非
兵科錢唐破監國至舟山黃斌卿拒不納監國入閩至
長垣而公始監名振軍出松江斌卿敗監國始入舟山
舟山破名振尙未死農祥所言無一不錯其曰是時隆
武亡鄭成功聞監國至而喜來受約束迎公廈門按監
國再由舟山入閩成功起兵已六年謂隆武至是始亡
異矣成功以隆武與監國不相能始終不奉監國謂受
約束異矣公與成功雖往還而未嘗合軍謂迎入廈門

異矣其曰己亥之役琉球日本師皆會按周崔芝嘗使日本乞師不得阮美又嘗乞師俱在舟山未破之先成功未嘗乞師也其時成功全軍而出公以所部別爲一營無外番之師也其曰河北圻南響應輦下議遷都以避則野人之言矣公師欲下九江以取楚聲息何能達近輔襲曹魏畏關公之語不知本朝德威之盛也其曰公之散軍脫歸九死一生惜無記錄之者然則農祥并公北征錄亦未見而妄爲公傳無惑乎其妄言也至謂公屯田林門島中被執則不知公被執時已散兵謂公

子死白下則不知其在京口總之無一語足據者郢書燕說混淆信史吾不知其何意也農祥自負博物近則方文輶杭大宗皆力推之不知其言無足采也

張忠烈公遺像徵詩啓

徐 淳 泗 亭

乾隆四十有一年我高宗純皇帝追諡明臣蒼水張公曰忠烈易名異代猶炳丹青補傳勝朝長留氣概廿載之孤忠斯慰千秋之曠典恭膺以視赦季布之誅崇余闕之祀者不尤幸歟何其盛也公有遺像藏自先人什襲以珍六丁斯護鬚眉勁挺骨格清癯寫警欬而如生

覺憔悴其可憫惟公慷慨尙義跡弛不羈一騎若飛三
發皆貫當鄉薦之伊始卽國步之方艱濤翻炭海日隕
煤山魚羊食人龍蛇厄運烈帝遐升北闕赧王失守南
畿乃有遺臣圖存故國爭迎魯邸新唱錢來稽山之甲
楯五千江岸之軍屯十七公招兵媽舉扈主翁洲流離
鼇島之間屯練鷺門之下諸將已皆挫衄鄭氏且有訾
嫌爲唐爲魯旣各奉其君若張若黃更交構其隙公獨
周旋悍帥之府籠絡義旅之心潛入吳淞頻居台越合
清河之眾出沃海之師遂掠丹陽進窺白下遙瞻石闕

望祭孝陵乞九廟之威靈誓三軍而慟哭顧乃上游失
信左次空還旋統名振之軍再結成功之約山羊啖而
銅鯨碎江龍斷而鐵鎖開礮火灼大艫樓雪浪濺其纛
帳秣陵烽急瓜步雷轟鄭自京口而南趨公自蕪湖而
東徇時則艘未盈百兵不滿千連下三十一城祇及旬
有五日神機捷於風雨黎獻慰其雲霓幾幾乎大義同
伸中興可冀矣不謂成功敗北變計東歸遽撤鎮江之
舟圖霸臺陽之島公以孤軍獨留重地遂潰師於英霍
爰遁迹於岩巖還駐天台仍集故部惠溥陂塘之利恩

結隴畝之歡有茲一旅一成終欲十盪十決旣乃親王
弗祿率土皆平清涼夏社祇有巢人斬絕姬宗寂無宣
靖天柱難擎於一木地維詎繫乎單絲公卽解散部曲
棲遁巖阿參軍侍史猶從從叔家人早逮仙鹿隨夢神
而逝靈猿引邏卒而來桐棺之餘米未餐竹簾之遺編
若燕西市就鳳山之麓南屏崇馬鬣之封蓋從公之命
欲與岳于而爲鄰而論公之忠則較文謝而尤苦也某
際不諱之朝每興追慕之感尙書集在笑貌猶新遺挂
圖存清高可仰所冀學林威鳳韻府文獅惠以瑤華泐

之石墨搜軼聞於浙水傳寶繪於甬江益增松柏之榮
抑亦枌榆之幸也道光甲午夏

壽鏞案竊與以斯啓文筆庸陋似不足存竊謂徐
泗亭家藏先生遺像出而徵求海內題詠使忠義
之氣不致泯沒豈可以文之優劣論耶

張忠烈公像贊

并序

宜興 吳德旋 仲倫

勝國之季鄞張忠烈公事魯王以一身膺重任歷艱危
者十有九年卒之從容就義忠蹟彪炳史乘黃梨洲徵
君旣誌公之葬其後全謝山太史復撰公神道碑銘益

詳哉其言之矣徐君泗亭夙秉懿德之好尤切桑梓之慕以公遺像徵題敬爲贊曰

烈烈張公遭時之艱有赫帝命曷知其遷大厦之傾許身一木孰與爲旁疇員於輻豈曰失圖險不可踰日之暮矣云何其吁臨危致身旣鞠旣瘁困上滅頂志亦云遂廬仁襲義終焉處休舍生獲所抑又何求仰瞻光儀式欽遺則頌聲洋洋垂之無極

題張忠烈公遺像

童槐粵君

前六十年吾宗老以六月九日會同人城北祀蒼水公

歸語客曰往年但翦紙爲神主今乃有人出公獄中像
瞻拜幸甚因具道公狀貌客色駭連詰像藏誰氏蓋一
發難將立禍者宗老笑斥之喻以朝廷曠典方專諡公
曰忠烈矣乃逡巡避去旣而有書傭受富人雇爲繕公
奇零草竝代覓工繪像卷首者忽相約獻之官欲以違
悖制富人良久方解是時錫諡蓋已十載餘猶尙如此
及嘉慶戊午余在武林以寒食拜公墓則丙辰詔舉孝
廉方正之徵士吾浙十一人咸在或議樹碑以彰褒諡
且欲購公像上石萬近蓬先生福其祖父故謀葬公者

私謂余曰當時之人度朝廷視公爲擾攘草澤故從而
詬病莫敢贊公一詞豈知聖度如天披發白日若此哉
余因對華表占句云神化留丹青人情枉翻覆蒼蒼南
屏山見公眞面目此數事常往來余胸中不能釋者今
徐孝廉忠代其宗人屬題此卷余思公事詳南雷鮚埼
兩集鴻筆之人自必能藉以發藻抑天褒震耀萬古矣
更需揚挖爲獨數十年來國恩所被收藏家得無意外
之虞以至於今是其可深幸而更宜慎守之者觀縷書
此誌幸也道光己亥九月朔